

DIDZA' BUROPI GUSÓL-LĒ'Ē PABLO QUEÉBI' BI'I TIMOTEO

Pablo rugapë' Dios bi'i Timoteo

1 ¹ Neda', Pablo, naca' gubáz nasól-lē'ē Cristo. Caní naca' tu' rē'ēnē' Dios gaca' caní, para caní gaca le guzxi' lu nē'ē, gunnē' queéru' yól-la' na'bán idú, le ruzá' ládxē'ē Jesucristo queéru'. ² Rugapa' Dios li', bóch'a'ado' Timoteo. Nacu' ca zxi'ini caza' tu' benru' tu zxön xichinē' Cristo, ate' nadxi'ida' li'. Rinábida'-nē' Xúziru' Dios, enca' Xanru' Jesucristo, uzá' ládxē'ē quiu', en huéchi' ládxē'ē li', en gunē' ga cō' dxi icja ládxi'do'o.

Timoteo ral-la' gunbi' ba nalí queē' Jesucristo

³ Rea'-nē' Dios: "Xclenu'" ca naca quiu' cate' rulidza'-nē' Dios. Biti' rizóa dxía' rinaba' ni'a quiu' rēla, en te dza lahuē' Dios, Nu na' runa' xichinē' idú ládxa'a ca na' gulunē' xuz xtá'ahua'. ⁴ Cate' rōjneda' ca na' gurōdxu', rizé ládxa'a ulé'eda' li', para gaca udzējada' idú ládxa'a.

⁵ Rea'-nē' Dios: "Xclenu'" tu' zoa le run ga rōjneda' ca réajlē'u Cristo idú ládxi'u. Lēsc'a' caní, gula'yéajlē'ēnu xinó'o gula Loida, enca' xinó'o Eunice Lē' zí'alō ca li', ate' runa' löza, lēsc'a' caní réajlē'u Lē' na'a.

⁶ Tu' naca caní, rusá'a ládxi'u para usubanu' le bennē' Dios quiu', lē na' bidxín quiu' cate' ni' guxóa na'a li', en bulidza'-nē' Dios. ⁷ Bö' na' bennē' Dios queéru' bití' naca tu bö' le gun ga gádxiru', pero bennē' queéru' Bö' Lá'ayi Nu run ga náparu' yól-la' huáca, en run ga nadxi'iru' luzá'aru', en run ca' ga rinná be'e cuinru'. ⁸ Que lē ni na', bití' utuí'inu' gunu' ba nalí queē' Xanru', en bití' utuí'inu' ca raca quia' neda' ni, nadzuna' lidxi guíē tu' runa' xichinē', pero ben tsözxón nupa ta'guí'i ta'zaca' tu' tun libán que didza' dxi'a. Dios gunnē' yól-la' huáca quiu' para gunu' caní. ⁹ Dios caz busölē' rē'u, en bulidzē' rē'u para gácaru' idú dxi'a. Bití' bulidzē' rē'u tu' zoa le dxi'a benru', pero bulidzē' rē'u tu' gú'uni quézinē' Lē', en tu' ruzá' ládxē'ē caní queéru'. Dza ni'te buzóē' caní queéru' zí'atēlō ca guta' yōdzölió ni, tu' néquiru' queē' Jesucristo.

¹⁰ Na'a, chibulú'i lahui le ruzá' ládxē'ē Dios queéru', tu' buluí'i lahuē' Jesucristo Nu rusölá rē'u. Bugúē' yól-la' guti, en bulu'e lahui yól-la' na'bán idú na', le cabí ca' initi. Caní naca ca rna didza' dxi'a.

¹¹ Cristo buzóē' neda' para guna' libán que didza' dxi'a na', en para gaca' gubáz queē' para usédigacada' bönachi izá'a. ¹² Que lē ni na' riguí'i rizáca'a ca' yugu' le raca quia' ni, pero bití' rutuí'ida', tu' núnbē'a Nu na' réajlē'a. Runa' löza Lē', napē' yól-la' huáca gapa chi'ē le budōda' lu nē'ē ga idxintē dza ni' huödē'.

¹³ Didza' dxi'a na' biyönnu' bena' libán que ral-la' gaca quiu' tu le ruluí'i ca ral-la' usédinu' bönachi ca réajlë'ëru' Jesucristo, en ca nadxí'iru' Lë'. ¹⁴ Ben chi'i le naca dxi'a na' nadödi lu no'o, ate' gaca gunu' caní len yöl-la' huáca queë' Dios Bö' Lá'ayi, Nu zóalen rë'u.

¹⁵ Chinóz quézinu' ca na' gulunë' zian bönni' ta'yéajlë'ë Cristo nacu'ë luyú Asia bulu'béaj ládxi'gaquië' neda'. Figelo, en Hermógenes nabábagaquië' bönni' ni. ^{16,17} Rinábida'-në' Xanru' Dios huéchi' ládxië'ë bönachi nacuá' lidxië' Onesíforo, tu' butipë' ládxi'a bönni' ni zían luzuí. Cate' bidxinë' Roma, idú ládxië'ë buguiljë' neda', ate' budzólinë' neda'. Biti' butuí'inë' ni'a quia' neda' tu' nadzuna' lidxi guíë ni, nága'a du guíë. ¹⁸ Rinábida'-në' Xanru' huéchi' ládxië'ë lë' dza ni' idxinë' lahuë' Dios. Chinóz quézinu' ca na' gúcalenë' bönni' ni rë'u, cate' ni' guzóaru' yödzö Éfeso.

Ral-la' gácabi' Timoteo ca tu bönni' idú ládxië'ë rejë' gudil-la

2 ¹ Na'a, zxí'ina'do', butipa ládxi'u ca naca le ruzá' ládxië'ë Jesucristo quiu'. ² Didza' biyönnu' bë'a lógaca zían nupa tun ba nalí que, didza' ni budödi lu ná'agaquië' bönni' tunë' ca ta'nnë', bönni' gaca ulu'sédinë' ca' ia'bal-la bönachi.

³ Ral-la' guá' ilenu' le ulu'saca' li' zi' ca na' ruá' rilén nu naca bönni' queë' Jesucristo idú ládxië'ë rejë' gudil-la. ⁴ Nu bönni' rejë' gudil-la, bití ca' gútsë'ë yugu' le tun bönachi yödzölió ni, para tsaza ládxië'ë bönni' na' nuzóë' lë' gáquië' bönni' queë' rejë' gudil-la. ⁵ Lësca' caní, nu nutsa' lu huitaj, bití bi ideli' channö cabí run ca ral-la' gun. ⁶ Nu bönni' gúz gú'una runë' dxin, zí'alö lë' uzi'ë xibé lë' na' razë'. ⁷ Busá' ládxi'u lë ni rea' li', ate' Xanru' caz gunë' ga tséajni'inu' yúgu'të.

⁸ Yöjné ca guca queë' Jesucristo. Guljë', en gúquië' zxí'ini xi'sóë' David, en gudödi gútië', bubanë' lu yöl-la' guti. Caní rnna didza' dxi'a runa' libán que. ⁹ Tu' runa' libán que didza' dxi'a, riguí'i rizáca'a le raca quia', ga ridxintë nága'a lidxi guíë ni, ca raca queë' tu bönni' huía' dö', pero bití ca' nága'të xtídzë'ë Dios. ¹⁰ Que lë ni na' ruá' riléna' yúgu'të lë ni tu' nadxí'ida' nupa guróë' Dios, para ulu'lë' ca' légaquië'. Jesucristo caz runë' ga ulu'lágaca bönachi na' para ila'cuá' lu bení idú queë'.

¹¹ Catëz naca lë ni rnna:

Channö nátilenru' Lë', sóalenru'-në' ca' ibanru'.

¹² Channö guá' ilenru' le quí'i sáca'ru', inná bé'lenru' ca' Lë'.

Channö ridá'baga'ru' Lë', Lë' tá'baguë'ë ca' rë'u.

¹³ Sal-la' bití runru' ca rnnaru', Lë' rúntica'së' ca rnnë'.

Lë' bití gaca tá'baguë'ë le náquië'.

Nu bönni' huen dxin queë' Cristo rurúajë' dxi'a

¹⁴ Busá' ládxi'gaca nupa nacuá' ga ni' zu' ca naca lë ni, ate' ni'a queë' Xanru' Dios gunná be'e légaquië' para cabí ila'dil-la dídzë'ë ca nácagaca

didza' cabí nazáca'gaca. Yugu' didza' caní tun ga ila'niti nupa tu'zé nagui léguequi. ¹⁵ Bě'tica'sö lădxu'u urúaju' dxi'a lahuë' Dios para gacu' ca tu bönni' huen dxin biti' rutuí'inë' ca naca dxin nunë'. Dxí'ado' ral-la' ugunu' dxin didza' idútë li. ¹⁶ Na'a, gucuíta ga nacuá' nupa tuí'i didza' biti' nazaca', en didza' cá'asö, tu' tun didza' caní ga ilunrë' le cabí ré'ënë' Dios. ¹⁷ Ila'zé didza' tu'ë ca rizxón huë' nudzu' le ridúdu' rilá. Himeneo, en Fileto nabábagaquië' nupa tuí'i didza' caní. ¹⁸ Iropë' ni gula'chixi gula'níguinë' ca naca le naca idútë li, tu' ta'nnë' chigudödi dza ral-la' ulu'bán nupa chinátigaca, ate' gula'béquië' baróli bal-la bönachi ga ridxintë bítirö ta'yéajlë' Cristo. ¹⁹ Le benë' tsutsu Dios zóatica'sö, en dë tu le naca bë', le rnna: “Núnbë'ë Dios nupa néquiguequi queë'.” Rnna ca': “Guli'cuíta ga raca le ruá' dö', yúgu'tëli libí'ili' néquili' queë' Cristo.”

²⁰ Tu lu yu'u zxön yú'ugaca le néquini, calégasö oro, en plata, pero lësca' le néquini yaga, en yu. Bal-la tu'gún bönachi léguequi dxin ga liná', ate' ia'bal-la tu'gún léguequi dxin ga biti' naca liná'. ²¹ Para gácaru' ca naca lë na' tu'gún bönachi dxin ga liná', en para gaca gunru' le naca dxi'a, en gácaru' lesaca' ugunë' Xanru' rë'u dxin, ral-la' ucuítaru' ga raca le ruá' dö'. Channö gunru' caní, gácaru' lesaca' gunru' yúgu'të dxin dxi'a.

²² Gurú'una le tun ga nu së ladxi' le ruá' dö' ca raca quégaquië' bönni' ra'bando'. Bë' ladxi' gacu' tsahui'. Ben le run ga réajlë'u Cristo, en le run ga nadxí'inu' yugu' luzó'o, en le run ga ribözu' dxí'ado'. Ca nácagaca lë ni, ben tsözxón nupa tu'lidza Xanru', naca idú dxi'a icja lădxi'do'guequi. ²³ Na'a, gurú'una yugu' didza' cá'asö, en didza' biti' nazaca', tu' chinóz quézinu' tun didza' caní ga ta'dil-la didza' bönachi. ²⁴ Bönni' huen dxin queë' Xanru' biti' ral-la' tıl-lalenë' bönachi didza', pero ral-la' gáquië' nōxaj ladxi' lógaca yúgu'të bönachi. Ral-la' gaca usédinë' bönachi, en gáquië' ca' zxön ladxi'. ²⁵ Lu yöl-la' nōxaj ladxi' ral-la' uzéajni'inë' nupa ta'dá'baga' le runë' libán que. Channö gunë' caní, nadxi ca' Dios gu'ë légaquië' lataj ulu'bí'i lădxi'gaquië' para ilúnbë'ë le naca idútë li. ²⁶ Caní ulu'lë' lu yalaj que tu' xihui' ga nadzúngaquië', ate' ulu'huöáquië' tsahui' para ilunë' ca ré'ënë' Dios.

Ca ilaca bönachi dza tsöjsétëgaca

3 ¹ Lësca' ral-la' inózinu' lë ni: Dza tsöjsétëgaca ilaca dza ila'guí'i ila'zaca' bönachi. ² Yugu' dza ni' ila'cu'ë bönni' ilácagaquië' caní: Ila'dxí'i la' cuíngacasë', en ulu'huídi'në'. Ilún ba zxön cuíngaquië', en ulu'luí'i cuíngaquië' zxön. Ila'nnë' zi'ë que le naca lá'ayi. Ila'dá'baguë'ë xuz xiná'agaquië'. Ilácagaquië' bönni' cabí ta'yaza lădxi'gaquië'. Biti' ilunë' ca ré'ënë' Dios.

³ Biti' ila'dxí'inë' ca ral-la' ilunë'.

Ilácagaquië' zidzaj ladxi'.

Ila'nnë' que luzá'agaquië'.

Biti' ila'nná be'e cúngaquië'.

Ilácagaquië' bönni' dza'a.

Biti' ila'lé'enë' dxi'a le naca dxi'a.

⁴ Ilácagaquië' hueti luzé'e, en bití' ila'dzáguië' dxi'a.

Ulu'luí'i cúngaquië' ca bönni' nayépisëgaquië'.

Ila'dxí'inë' le ila'yázasö ládxi'gaquië', en calëga Dios.

⁵ Ulu'luí'i cúngaquië' ca bönni' núnbë'gaquië' Dios.

Ila'dá'baguë' le ruzá' ládxië' Dios queëru'.

Gucuíta ga nacuá' bönachi caní. ⁶ Lësca' caní, lu yöl-la' banísa quëgaquië' ila'yazë' gapa naca lu yu'u, en ila'zí' yé'enë' yugu' nigula bití' bi nózguequinu para ila'zí' lu ná'agacanu le ulu'sédinë'. Ila'bága'nu nigula na' dul-la' zían, en ilu'í'i ládxi'gacanu yugu' le ila'zësö ládxi'gacanu le cabí nazaca'. ⁷ Ila'yónitica'sinu nigula ni didza' ilún libán que bönachi, pero bití' ca' ila'déli'nu ila'yéajni'ininu le naca idútë li. ⁸ Ca na' guláquië' Janes, en Jambres, bönni' ni' gula'dá'baguë'ë Moisés, lësca' caní ilácagaquië' bönni' ni, ila'dá'baguë'ë le naca idútë li. Ilácagaquië' chul-la niti, en ila'chíxinë' ca naca le réajlë'ëru' Cristo. ⁹ Bití' ila'déli'rönë', pero gaca bë' nácagaquië' bönni' bití' bi nózguequinë' lógaca yúgu'të bönachi, ate' gaca quëgaquië' ca na' guca quëgaquië' Janes, en Jambres na'.

Le rigu'ë Pablo lu ná'abi' bi'i Timoteo

¹⁰ Nöz quézinu' ca naca le rusédida' bönachi, en ca runa'. Nózinu' ca' le ruí'i ládxa'a guna', en ca réajlë'a Cristo, en ca naca' nözaj ladxi', en ca nadxí'ida' luzá'a, en ca riböza' zxön ladxi'. ¹¹ Nózinu' ca' yugu' le gula'bía ládxi'gaca bönachi neda', en yugu' le gudí'i guzxáca'a, le gulaca quia' lu yödzö Antioquía, en lu yödzö Iconio, enca' lu yödzö Listra. Yugu' le gula'bía ládxi'gaca bönachi ni' neda' biá' guléna', ate' Xanru' Jesús busölé' neda' lu yúgu'të lë na'. ¹² Yúgu'të nupa té'ëni ilaca idú dxi'a tu' néquiguequi queë' Jesucristo, lësca' ila'guí'i ila'záquië' yugu' le ila'bía ládxi'gaca bönachi légaquië'.

¹³ Na'a, bönni' tuá' dö', en bönni' ta'zí' yë'ë ilácarë' xihui'. Ila'zí' yé'enë' bönachi, ate' ila'zí' ye'e bönachi ca' légaquië'.

¹⁴ Na'a, ben chi'i yugu' le buzëdu', en le guzxí' lu no'o, tu' nunbë' cazu' nupa bulu'sedi li'. ¹⁵ Ga gudela' nacu' bí'ido' núnbë'u le nazúajgaca lu guichi lá'ayi, le huáca ulu'zéajni'ide'e li' para uló' tu' réajlë'u Jesucristo. ¹⁶ Yúgu'të le nazúajgaca lu guichi lá'ayi guchízië' Dios icja ládxi'do'gaca bönachi queë', nupa na' bulu'zúaj lu guichi didza' na' bë'ë Dios. Lë na' nazúaj lu guichi nácada' lesaca' usedi rë'u, en ubéaj ga liná' le runru', en ugú'u rë'u tu nözä, en usedi rë'u para

gácaru' tsahui'. ¹⁷ Caní run, para gaca sina' nu naca queë' Dios, en gácada' gun yúgu'të le naca dxi'a.

4 ^{1,2} Ni'a queë' Xanru' Dios, enca' Xanru' Jesucristo, rinná bé'eda' li' gunu' libán que xtídzë' Xanru'. Lë cazë' uchi'a usöröë' nupa ni nabángaca, en nupa chinátigaca, dza ni' huödë' idinná bë'ë. Bë' ladxi' gunu' lë ni channö raca dxi'a quiu' o biti' raca dxi'a. Lu yöl-la' zxön ladxi', guléaj ga liná' le tun bönachi. Busá' ládxi'gaquië', en guchiza icja nágagaquië' ca naca lë na' rusédiru'. ³ Caní ral-la' gunu' tu' idxín dza cate' biti' ulu'zé nágagaquië' xibá tsahui', pero ilé'ëninë' ila'yönnë' le ta'dánisinë'. Ca ta'zësö ládxi'gaquië' ulu'tubë' quégaquië' nupa ulu'sedi légaquië'. ⁴ Ulu'cá'anë' le naca idútë li, en ila'zí' lu ná'agaquië' yugu' didza' ridasö. ⁵ Na'a, ral-la' gacu' zxön ladxi' lu yúgu'të le runu'. Biá' gulén le ulu'saca' li' zi'. Ben libán que didza' dxi'a. Idú ládxi'u ben dxin le budödë' Cristo lu no'o gunu'.

⁶ Ca naca quia' neda', nudödi cuina' lu në'ë Dios, ate' chizóa ilútië' neda' tu' runa' xichinë', ate' dza uzá'a yödzölió ni chizóa idxín. ⁷ Ca runë' tu bönni' idú ládxi'ë rejë' gudil-la, lësca' caní bena' neda' dxin, en chibudxi bena' le budödë' Cristo lu na'a guna', tu' bena' idú ca sa'yéaj le réajlë'ëru' Cristo. ⁸ Ia'stú, naca löza quia' idéli'da' le ral-la' ila'zí' nupa nácagaca tsahui', le gunnë' Xanru' quia' dza ni', ate' tsahui' naca ca ruchi'a rusöröë' rë'u. Calégasö quia' neda' gunnë' le, pero lësca' gunnë' le quégaca yúgu'të nupa ta'dxí'i Lë', en idú ládxi'guequi ta'böza dza huödë'.

Le buzúajë' lu guichi Pablo gunbi' Timoteo

⁹ Bë' ladxi' guídateo' ga ni zoa' ¹⁰ tu' guléaj ládxi'ë Demas neda', tu' nadxí'inë' le ruzi'ë xibé yödzölió ni, ate' guyijë' yödzö Tesalónica. Crescente guyijë' luyú Galacia, ate' bi'i Tito guyéajbi' luyú Dalmacia, tu' caní ben bayudxi ilunë'. ¹¹ Tuzë' Lucas zóalenë' neda'. Guché'ë-bi' bi'i Marcos para guí dalenbi' li' tsözxón, tu' nácabi' gúnlenbi' neda' tsözxón xichinë' Cristo. ¹² Gusól-la'a-bi' bi'i Tíquico lu yödzö Éfeso. ¹³ Cate' guídu', biá' quia' lari' guitsa' na' bucá'ana' lu yödzö Troas lu yu'u lidxë' Carpo, en biá' ca' quia' yugu' guichi, en le naca lo, biá' quia' yugu' guichi néquigequini guídi.

¹⁴ Alejandro, bönni' gubëdxi guié, zían le bi'ë dö' quia'. Lë cazë' Xanru' ubi'ë queë' ca nácagaca le benë' bönni' ni quia'. ¹⁵ Ben chi'i cuinu' queë' bönni' ni, tu' ridá'baga'dë'ë didza' runru' libán que.

¹⁶ Cate' le zí'alö luzuí bidxina' lógaquië' bönni' yúlahui', cuntu nu gúcalen neda', pero bulu'béaj ládxi'gaca yúgu'të bönachi neda'. Biti' ré'ënda' uzí' lëbë' Dios légaquië'. ¹⁷ Guzóalenë' Xanru' neda', en butipë' ládxa'a para údxi guna' libán que xtídzë'ë para ila'yöni yúgu'të bönachi izá'a le. Caní guca, busölë' Xanru' neda', ate' guca quia' tsca burúaja' lu ruá'aba' bëdxi guixi'. ¹⁸ Lë cazë' Xanru' usölë' neda' lu yúgu'të le cabí

raca dxi'a, en gun chi'ë neda' ga idxíntea' ga rinná bë'ë Lë' ni' yehua' yubá. ¡Gácatíca'sö queë' yöl-la' ba yúgu'të dza zá'gaca! ¡Ca' gaca!

Pablo rugapë' Dios bönachi queë' Cristo

¹⁹ Bugapa Dios Priscila, en Aquilo, enca' bönachi nacué' lidxë' Onesíforo. ²⁰ Bugá'anë' Erasto lu yödzö Corinto, ate' bucá'ana'-në' Trófimo luyú Mileto tu' ré'enë'. ²¹ Bë' ladxi' guídu' ga zoa' zí'alö cate' idxín beo' ziaga. Eubulo, en Pudente, en Lino, en Claudia, en yúgu'të böchi' luzá'aru' ni tu'gapë' Dios li'.

²² Rinábida'-në' Xanru' Jesucristo sóalenë' li'. ¡Gácalen li' le ruzá' ládxë'ë Dios quiu'! ¡Ca' gaca!